

空同诗集

空同詩集

空同詩集卷之十五

明北郡李夢陽撰

七言古

漢京篇

明星篇

楊花篇

去婦詞

蕩子從軍行

右次倣初唐體五首

洛陽道

野田黃雀行

苦寒行

結交行

梁園歌

梁園雪歌二首

世不講曹李詩尚矣內弟會余河上能章章道也驚

有此贈

酬錢水部錫山之招

寄錢水部

十四夜翛然臺二首

十五夜軍

十六夜

十七夜

客有笑余霜髮者走筆戲之

戲作放歌寄別吳子

右次效李白體一十七首

空同冰車行

鹽井行

右次用張王體二首

清夜行

右次用李賀體一首

沉大夫行

雪山歌送萬子

廣州歌送羅叅議

右次長短句三首

七言古一

倣初唐體

漢京篇

漢京臨帝極
複道眾星羅
煙花開甸服
錦繡列山河
山河

自古稱佳麗城中半是王侯第峻閣重樓夾道懸雲房霧
殿森虧蔽牧豚賣珠登要津樊侯亦是鼓刀人時來叱咤
生風雨奄見吹噓走鬼神平津結兄蓋侯弟杯酒相看何
意氣執鞭盡是虎賁郎守門不說長安尉長安烽火入邊
城挺劍辭君萬里行去日千官遮馬餞歸來天子降階迎
朱弓尙抱流沙月寶鉞常飛翰海星不分燕然先勒石直
教麟閣後標名豈知盛滿多仇忌可惜榮華如夢寐地宅
田園奪與人丹書鐵券成何事霍氏門牆狐夜號魏其池
館長蓬蒿三千劍客今誰在十二珠樓空復高後車不戒
前車覆又破黃金買金谷洛陽亭榭與山齊北邙車馬如

雲逐陰郭豪華真可憐
雲臺將相珥貂連
當時卻怪桐江叟
獨着羊裘伴帝眠

明星篇

正德間早起聞內教場砲喊之聲作此篇也

明星出地一丈高
天門沈沈魚鑰動
沙堤露下玉珂寒
直廬鷄唱金蓮重
千門萬戶曉鐘發
明星漸高河漸沒
燦爛疑侵翔鳳樓
依稀故抱飛龍闕
鳳樓龍闕帶曾城
翠輦朱衣夜夜行
黃昏競奏催花宴
天明猶聽打毬聲
蘭烟桂火輝如日
明星迢迢照不入
百子池頭青草生
長信宮中紫苔集
草色苔香秋復春
此日乘槎若問津
明星曉落宵還

見白髮黃金愁殺人

楊花篇

洛陽三月東風起楊花飛入千門裏只見朝縈上苑烟那
知夕逐東流水苑烟流水無休歇暖日輕盈度仙闕趙女
瑤臺貯綵霞班娘團扇啼明月綵霞明月幾沈輝陌上行
人亂撲衣征夫柳塞愁看鴈少婦深閨懶上機柳塞香閨
萬餘里草色連天度隴水玉門關外雪猶飛章臺樹裏風
先起誰家浪子千金馬平明挾彈章臺下頭上羅巾玳瑁
簪腰間寶鉞珊瑚把踏絮來尋賣酒家持香坐調當壚者
當壚美女怨陽春笑掇楊花襯繡裯青樓薄暮難消遣白

雪漫天愁殺人冥冥漠漠春無極此時惟有楊花色一朝
風雨靡蕪爛獨慘垂條三歎息

去婦詞

正德元年戶部尙書韓文暨內閣師保等咸相繼去
位李子作此詞也

孔雀南飛鴈北翔含顰攬涕下君堂繡幙空留並菡萏羅
袂尙帶雙鴛鴦菡萏鴛鴦誰不羨人生一別何由見只解
黃金頃刻成那知碧海須臾變賤妾甘爲覆地水郎君忍
作離弦箭憶昔嫁來花滿天賤妾郎君俱少年瑤臺築就
猶嫌惡金屋妝成不論錢重樓複道天中起結綺臨春照

春水宛轉流蘇夜月前
萋迷寶瑟烟花裏
夜月烟花不相待
安得朱顏常不改
若使相逢無別離
肯放馳波到東海
薄命難教娣姒知
衰年恨少姑嫜在
長安大道接燕川
鄰里攜壺舊路邊
妾悲妾怨憑誰省
君舞君歌空自憐
郎君豈是會稽守
賤妾甯同會稽婦
郎乎幸愛千金軀
但願新人故不如

蕩子從軍行

蕩子從軍行者本駱氏蕩子從軍賦也余病其聲調不類於是改焉

胡兵十萬起妖氛
漢騎三千掃陣雲
隱隱地中鳴戰鼓
迢迢

迢天上出將軍邊沙遠離風塵氣塞草常萎霜露文蕩于
辛苦十年行回首關山萬里情才聞突陷賢王陣又遣分
圍右校營紛紛鐵騎朝常警寂寂銅焦夜不鳴滄波積凍
連蒲海雨雪凝寒遍柳城地分玄徼指青波關塞寒雲本
自多嚴風凜凜將軍樹苦霧蒼蒼太史河揚麾拔劍先挑
戰征旆凌沙犯霜霰樓船一舉爭沸騰烽火四連相隱見
戈文耿耿懸落星馬足駸駸擁飛電終當取俊效先鳴豈
暇論功稱後殿征夫行樂踐榆溪倡婦銜怨坐空閨靡蕪
舊曲終難贈芍藥新詩豈易題池前怯對鴛鴦伴庭際羞
看桃李蹊蕩子別來年月久賤妾深閨更難守鳳凰樓上

罷吹簫鸚鵡杯中臨勸酒同道書來一鴈飛此時緘怨下
鳴機已剪鴛鴦帖夜被更薰蘭麝染春衣屏風宛轉蓮花
帳牕月玲瓏翡翠幃箇日新妝如復罷祇應含笑待郎歸
效李白體

洛陽道

桃花馬金絡頭白面郎紫貂裘三月洛陽道垂柳蔭清溝
溝水東流不記春花開花落幾迴新東風日暮楊花起愁
殺高樓獨倚人

野田黃雀行

鶉奔奔鵲僵僵來逢野田雀相逐過南疆北地苦霜雪南

地多稻粱人生美食被綺衣不及鴻鴈能高飛鴻鴈下天
遭網羅不食柰爾黃雀何

苦寒行

太行之山何崔嵬天寒谿谷禽獸饑黃熊赤羆力相食翠
衿繡翼徒南飛啄食飲泉百意足野田稚子寒無衣張羅
掛畢伺鳥雀口作雌雄鳴且悲鵲鴉小鳥鼓翅落鼎食之
家意不樂頓箸待爾登品錯奏應鐘開玄堂瓊幃錦幄冬
夜長微禽效體樽俎光禿鶯鴛鵲當簷翔

結交行

昔時韓生有豔妻其君使築青陵臺南山有鳥不肯來烏

鵲雖小禽不受鸞鳳猜以此築臺成二人葬寒灰舉國見
之悲且哀悲且哀斷人腸墳上連理樹變爲兩鴛鴦搥吭
交頸綺翼張春風蛺蝶花飄揚君不見酈呂結交日朝爲
刎頸暮拋擲如此結交復何益

梁園歌

朝發金臺門夕度博浪關黃河如綵天上來千里不見淮
南山淮南桂樹弄婆娑掛席欲進阻洪波我今亦作梁園
歌梁園昔有信陵君名與岱華爭差我三千珠履不動色
屠門執轡來相過功成不顯涕滂沱青蠅白璧一何多我
爲梁園客不登梁王臺錦帆揚州門一去何時迴荒烟白

草古城沒登臺望之令心哀令心哀歌且謠迷塗富貴苦
不足甯思白骨生蓬蒿人生三十無少年積金累玉空煎
熬獨立天地間長嘯視今古城隅落落一堆土千年誰繼
白與甫攬淚浮雲灑煙莽灑煙莽風吹卷波濤沈吟投箸
不暇食蹴天濁浪何滔滔君不見昔人然諾一相許黃金
斗印如秋毫

梁園雪歌

昔對燕山雪岩堯白玉京曉曳王恭氅飄颻入紫清今爲
梁園客獨對梁園雪黃雲索寞連滄海九疑望盡飛鴻絕

其二

飄風動三極霏雪灑煙海天地倏低昂虛無變光彩梁臺
空嶮岼枚馬今安在飛光超忽若游龍我欲從之問千載
世不講曹李詩尙矣內弟會余河上能章章道也

驚有此贈

曹植白馬篇李白飛龍引流光耀千古不與日星隕世人
捧心戚番爲西子哂左生三十歲雅志測沈冥鯨飲傾百
川自稱吾酒星今朝理酒船來過子雲亭高談呌太白八
斗揮雷霆霜雪連山海氣惡柳枝簌簌冰花落此時萬里
無人煙誰信清吟動池閣動池閣生暮愁雪澤古龍寒啾
啾他時爾獻三都賦我釣長江萬里流

酬錢水部錫山之招

無錫錢少陽招我棲錫山江上千萬峰裊裊凌江關下有
震澤湖旁有太伯灣昔時蘇公慕陽羨陽山錫山對相見
我獨何爲阻茲游西風吹心落吳甸我問錢少陽汝今在
何所振轡金馬門看花曲江潯徐庶竟辭劉張翰憶吳州
鵝湖雲嶼間鴻山林樹秋我今放浪黃河隅遙憶白粲心
鬱紆幾時彈劒賦歸來與爾共醉芙蓉湖

寄錢水部

我今在何所牧釣睢川陽子今在何所飛蓋臨東方高山
大澤不我限胡爲日夜遙相望鴻鴈日南飛不寄一封書